

四庫全書

史部

欽定四庫全書

蜀中廣記卷十

明 曹學佺 撰

名勝記第十

川西道

龍安府

平武縣附郭

顧野王輿地志云陰平縣本漢梓潼縣地晉人流寓於蜀者仍於益州立北陰平郡西魏廢帝二年定蜀改北

陰平為龍安魏志景元四年諸軍攻蜀鄧艾自陰平行
無人之地七百里鑿山通道作橋閣山高谷深至為險
難艾以氊自裹縛而下將士攀木緣崖魚貫而進先登
至江油即此地晉於此置平武縣志云唐宋之龍州
在雍村埧梁李龍遷築城於此魏置州遺址尚存雍村埧
者宋紹定進士郡人雍繁孫有文學見所製文昌祠碑
村因此名今之郡治則樂平鎮也蒲規修造記云通階
秦路嚴禁出入與劍門關為比矣唐許棠送龍州

樊使君詩曾見邛人說龍州地未深碧溪飛白鳥紅旆
映青林土產唯宜藥王租只貢金政成閒宴日誰伴使
君吟李洞送龍州田使君詩御札軫西隣龍州出牧時
度關雲作雪挂棧水成澌劍淬號猿岸弓懸宿鶴枝江
燈混星斗山木亂槍旗鎖庫休秤藥開樓又見詩無因
陪宴集吟苦憶京師項斯龍州與韓將軍夜會詩庭綠
草纖纖邊州白露沾別歌綠劍起客淚是愁添見月猿
啼樹迴風雪滿簾將軍盡尊酒樓上賦星占李洞亂後

龍州送鄭郎中兼寄鄭侍御詩侍車登疊嶂經亂集鶴
原省壞蘭終潔臺寒栢有根縣晴江入峽樓靜雪連村
莫隱匡山社機雲受晉恩又龍州送裴秀才詩違拜旂
旗前松陰路半千樓衝高雪會驛閉亂雲眠榜掛臨江
省名題赴宅筵人求新蜀賦應貴浣花牋宋邵稽仲詩
峭壁陰森古木稠亂山深處指龍州猿啼鵲噪溪雲暮
不是愁人亦自愁 方輿勝覽龍州倅廳有吏隱堂僉
判趙衆詩滿耳江聲滿目山此身疑不在人寰民舍古

意村村靜吏東刑書日日閒司馬君實和云四望逶迤
萬疊山微通雲棧訪雲鬟誰知吏道堪棲隱未必人
間有此閒范景仁和云花陰掃榻常欹枕月色侵門不
下關因諷君詩想佳景夜涼依約夢魂閒寰宇記云
龍穴山在陰平縣東北五十里古老相傳此山有龍鬬
死血變為石宋齊於此置龍血戍李膺益州記云龍血
東有龍像巖絕壁約萬餘丈有四石龍在壁間今尤可
驗巖之東北有洞穴莫測深淺泉出其下又云馬閣

山在陰平縣北六十里北接梁山西接岷峨昔鄧艾伐
蜀從景谷路徑龍州江油縣至此懸崖絕壁乃束馬懸
車作棧閣方得路通因名馬閣山 龍門志云竇子明
遇仙處在縣西北九十里今仙女舖是宋理宗寶祐間
有人於小溪山下見二女子冉冉升雲而去異香經日
不散龍安新志又云仙女洞在治南江村口山勢盤旋
巖洞深邃水自中出百里流入劍南故老相傳每風日
清和遙見仙女靚粧遊行巖上或理髮或浣衣於洞壑

中隱顯不常人跡罕到洞中石乳融結狀甚奇怪色如
碧玉取可供玩也 道教靈驗記云梁武陵王紀理益
州使李龍遷築城於牛心山龍遷既歿便葬山側鄉里
立祠號李古人廟唐初改為觀其後武氏革命鑿斷山
脉明皇幸蜀有老人蘇坦奏曰龍州牛心山國之祖墓
今日蒙塵之禍乃則天掘鑿所致明皇即令刺史蘇邈
併工修填如舊明年誅祿山復宮闕至德二年乃升龍
州為都督府號靈應郡僖宗幸蜀宗子李特請遣道士

醺山祈福禮有加焉按唐書高祖紀七世祖曰曷為梁
昭武王生歆歆生重耳重耳生熙熙生天錫天錫生虎
虎生晒晒生淵是為高祖虎當西魏時賜姓大野氏是
虎祇仕西魏亦非仕梁也此說不知何據 陰平修路
記云龍安棧閣在治東者曰石城曰佛崖曰麻園曰墓
頤曰黃林曰三店原曰七里即左擔也曰飛仙已上凡
八在東南者曰石回曰興文即袁烈婦投崖處曰猿臂
在東北者曰秦隴曰東閣已上凡五在治東者曰金鼓以

形肖也曰芭蕉曰楮株曰盧厓監司盧姓者所修曰天井曰桑坪曰堦索曰木蕊曰飛泉已上凡九在治西北者曰金匱曰桐油曰隆奉曰胡空曰黃梗曰劉村曰鵝頂曰禪峰曰石門曰仙女曰馬桑曰溪壩曰黑水曰羅漢曰羊腸已上凡十有五

江油縣

古江油郡及縣今平武之江油舖是以江水所由矣元遷江油於武都興教鎮則今縣也方輿勝覽云太白

臺在江油縣太白與江油尉往來故有臺在尉亭蒲翰
為之記其贈江油主簿詩云嵐光深院裏傍砌水泠泠
野燕巢官舍溪雲入古廳日斜孤吏過簾捲亂峰青五
色神仙尉焚香讀道經為米芾書刻在縣衙志云縣西
三里有山接彰明界高聳亭亭形如匡字此大匡山也
又云南二十里點燈山即彰明之小匡山上有太白祠
矣寰宇記云涪水在縣北一里自松州崆峒山出西
北至州界南入綿州界益州記云陰平縣有左擔道其

路至險擔在左肩不得度右肩也鄧艾由此伐蜀勝覽云左擔路上涪水崖壁有閣道六曰青崖曰墓頤曰石回曰七里曰東閣曰石城即陰平所記者又縣有二閣曰猿臂曰黃林不在左擔之數寰宇記云石門在江油縣東百里有石門戍漢水記云與氐分界於石門仇池戍去石門四百餘里左思蜀都賦云緣以劍閣阻以石門顧野王輿地志云石門在褒中之北漢中之西今按其山兩邊有石壁相對望之如門鄧艾伐蜀歷此

寰宇記云天池山在州南百三十里高九十二丈上有池周廻二十三步其水常滿號曰天池本名石人山天寶六年勅改為靈液山 勝覽云太華山在江油縣南百四十里有三峰奇怪碑目云弘真觀古碑在江油縣南百三十四里太華山之登真觀此碑最古不記撰人姓名按此山即羣仙錄所載黃奉仙隱處

石泉縣

漢靈帝以汶江蠶陵廣柔三縣立汶山郡廣柔即今

之石泉也志云縣北二里有泉甘冽崖上刻甘泉古蹟
四字此縣名之始矣唐屬茂州宋神宗時靜州夷寇邊
攻茂州室隴東以孤石泉成都守孫義叟經畫事宜以
石泉為邑介綿茂之間道里闊遠緩急不相應非扼其
衝要不足捍外患於是詔改石泉縣為軍按新編張上
行字道從漢州德陽人登元豐第習於邊計後會石泉
夷犯邊朝廷命義叟帥蜀召公問計公引唐王涯傳云
吐蕃有兩道一由龍安青川縣一由綿州威蕃柵取抵

鷄城皆虜之險要今石泉三十里威蕃亭地名柵底即唐之威蕃柵宜先築堡寨以禦其來次陞石泉為軍以重其權然後調思黔義軍以制其暴則取功一時為利後世不然蜀之憂未艾也義叟盡用其策 石泉圖

經國乎衆山之隈林巒叢箐樵蘇恣取不食地利而生計亦足 寰宇記縣蜀山史記黃帝子昌意娶蜀山氏女蓋此山也 郡國志云石紐山今在石泉縣南帝王世紀以為鯀納有莘氏胸臆坼而生禹於石紐郡人

以禹六月六日生是日熏修禊享歲以為常水經注云
石紐夷人共營之地方百里不敢居牧有罪逃野捕之
者不逼能藏三年不為人得則共原之言大禹之神所
祐也碑目云禹穴二字大徑八尺李太白書刻在絕壁
上又云石泉縣有周萬歲通天碑前內供奉書手王
惠元書其石擊之清亮全類玉音碑陰有段文昌留題
在報恩光孝觀又云誓水柱在治西四十五里河岸柱
高丈許圍五尺前人恐水衝縣故立此誓之未詳年代

蜀中廣記卷十

欽定四庫全書

蜀中廣記卷十一

明 曹學佺 撰

名勝記第十一

上川南道

嘉定州

水經曰江水至犍為武陽縣青衣水沫水從西南來合而注之鄜道元註云江水又東南逕南安縣西有熊耳

峽連山競險接嶺爭高河平中山崩地震江水逆流懸
漑有灘名壘坻亦曰監漑李冰所平也縣治青衣江會
襟帶二水矣 華陽國志云青衣有沫水出濛山下伏
行地中會江南安觸山脇濶崖水脈漂疾破害舟船歷
代患之李冰發卒鑿平濶崖通正水道或曰冰鑿崖時
水神怒冰乃操刀入水中與神鬪至今蒙福按漢書溝
洫志蜀守李冰鑿離堆避沫水之患晉灼云堆古堆
字即此 寰宇記云青衣水發源自瀘山徼外東南

流逕嚴道洪雅夾江至龍游與岷江合沫水發源大渡
河一名戕水自陽山縣流入江按青衣沫水合流在州
西十五里俗名尖山其下為紙房楮薄如蟬翼而質堅
可久 通志云嘉定州治在兩川合流之際晉郭璞所
定治東有八卦井即璞所鑿 水經注云蜀王開明故
治也來敏本蜀論曰荆人鼃令死其尸隨水上荆人求
之不得鼃令至汶山下邑復生起見望帝望帝者杜宇
也從天下女子朱利自江源出為宇妻遂王於蜀號曰

望帝望帝立鼈令以為相時巫山峽壅而蜀水不流帝
使鼈令鑿巫峽通水蜀得陸處望帝自以德不若遂以
國禪號曰開明 蜀記云古夜郎國傳為一女人浣溪
有竹浮下而中啼聲取而視之則孩也及長呼為夜郎
封竹溪王今治北三里有竹公溪矣按宋祁答勸農李
淵宗嘉州江上見寄詩嘉月嘉州路柯我接畫船山圍
杜宇國江入夜郎天即詠此事又輿地廣記云漢武帝
開夜郎置犍為郡漢書地理志夜郎故縣乃屬牂牁郡

如此則今之嘉州犍為郡非夜郎故地矣後世徒見嘉州
名犍為郡又領犍為縣遂以為夜郎國恐失真 蜀志補
罽云嘉州十五景唐貞觀中刺史盧士瑛記曰望靈峰曰
西嶺精舍曰石梁水曰後壑曰分溪塘曰桂竹汀曰梭原
曰茗岡曰六度潭曰長林閣曰望山臺曰青菴徑曰山樵園
曰石壑院曰南洲草堂併賦詩刻之石上宋鄧諫從云天
下山水窟有二曰嘉定曰桂林鮮于繪議道堂記云漢嘉背
負三峩襟帶二江為西南州最清歸處 海錄碎事載偽蜀

歐陽彬得嘉州曰青山綠水中為二千石作詩飲酒為風
月主人豈不佳哉其後太守呂昌朝以宋復古所畫八景圖
皆天下名勝懸於州治與相映發蘇子瞻有八詠繼東吳之
贈也 蜀都賦云戶有橘柚之園注曰出犍為南安縣華
陽國志南安有柑橘官社出名茶 寰宇記云有石碑山
山上遍植海棠為郡守宴賞之地一名海棠山花譜云海
棠有色無香惟蜀之嘉州者有香 吳中復戒石云嘉州
出荔枝輿地紀勝有荔枝樓愛日齋叢抄云乾道間陸放

翁取家藏前輩筆札盡刻石置荔枝樓下方輿勝覽
云梨花山過西津橋五里有梨花百餘樹人寒疾取此
花食之即愈岑參過西津王判官所居詩勝迹不在遠
愛君池館幽素懷茗中語宛得塵外遊通志云蓮花
山在治東八里山陽有溪四時不涸產蓮花為盛樓
臺亭榭雅與勝會者曰都督府唐于邵序云屏灘古地
熊阜外虞長空青冥通波萬里曰郡齋平望江山岑
參詩山光圍一郡江月照千家曰丁東院在州學前

院有方響洞洞腹有水如環珮聲黃魯直詩古人題作
丁東水自古丁東直至今我為更名方響洞信知山水
有清音范成大詩隔凡水碓不可越衆真微步壺中月
徙倚含風玉佩聲何須聽作庭賓鏡自注云漢嘉廣佛
院中水洞有聲琅然莫知其所由來舊名丁東水山谷
易今名且有詩也石介詩云萬樹芙蓉秋色裏千家方
響月明中 曰澄江樓在憲司左窺龍泓右瞰烏尤高
明夷塏得江山之趣淳祐間提刑程逢辰摹刻蘇子瞻

書其外祖程公逸事於此 曰明月樓在譙樓之右下
瞰明月湖郭璞識云鬱姑鬱姑將州對洛都但看千載
後變成明月湖後隋鬱姑將軍開此湖也洛都山名在
州西五里 曰壁津樓宋郡守遊仲鴻建魏了翁記在
治東南跨城為樓下瞰江流三峩九頂森列左右 曰
萬景樓在高標山上高標一名高望郡之主山也有弘
明觀後周所初隋大業末方製大殿塑飛天神王像
無名氏記其神異甚詳樓為宋郡守呂由誠建字文粹

中記范成大云嘉州城中山上登覽勝絕殆冠西川予
令畫工作圖以歸山谷山谷來游時但有安樂園未有
此樓也後人立涪翁亭在此樓前 曰月榭陸務觀詩
試傾萬景湖亭酒來看半輪江月秋為同年王子蒼作
也註云傍榭有一品景趣尤佳子蒼欲作樓未果 曰碧
雲亭在石筍之隙楊暈記云石挺出於山傍高丈有二尺
上銳而下廣衆水匯於前左右視羣山之邈迤若覆盂於
地此亭在其上也 熊耳平羗據其上流寰宇記云熊耳

水一名熊耳峽古老言武侯鑿山開道即熊耳峽東古道也又云平羗縣本漢平羗戍在滎州應靈縣界深谷戍是也周保定年置縣隋大業中獠叛移就大江唐寶曆中又移於開峽驛道書謂之平羗化山圖經云天下二十四化之一也有太白亭在焉相傳太白讀書於此黃魯直作亭其上蘇子瞻詩云我眉山月半輪秋影入平羗江水流謫仙此語誰解道請君見月時登樓石闕堂溪環遶其趾郡國志云龍游縣有二石闕即漢武

帝使唐蒙下夜郎置碑目云嘉州舊市鎮石關上有唐
李德裕領重兵過此九字寰宇記云石堂溪水在縣東
一里源出溪泉流入明月湖亭退入流花橋會大江薛
能石堂溪詩三面枕漁樵前門向郡橋岸沙崩橘柚山
徑入茶苗夜擁軍烟合春浮妓舸邀此心無與醉花影
莫相饒 九頂烏尤傑立捍流方輿勝覽云九頂山在
城左有九峰曰鳳集棲鸞靈寶就日丹霞祝融擁翠望
雲兌說唐會昌已前峰各有寺今惟存凌雲一寺又名大

像寺開元中僧海通於瀆江沫水濛水三江之合衝濤
怒浪之濱鑿山為彌勒大像高踰三百六十尺建七層
閣以覆之至韋臯時積十九年而工始備臯有大像記
墨莊漫錄云嘉州凌雲寺大像記韋臯文張綽書其碑
甚豐字畫雄偉頃於潘義榮處見之岑參詩寺出飛鳥
外青楓戴朱樓搏壁躋半空喜得登上頭始知宇宙濶
下看三江流天晴見峨眉如向江上浮迥野烟景豁陰
森棕栢稠願割區中緣永從塵外遊回風吹虎穴片雨

當龍湫僧房雲濛濛夏月寒颼颼迴合俯近郭寥落見
遠舟發槩無端倪天宮可淹留一官詎足道欲去令人
愁薛能詩像閣與山齊何人置石梯萬烟生聚落一崦
露招提霽月人來下殘陽鶴去棲從邊亦已極烽火是
沉黎司空曙詩春江古寺遶滄波石磴盤空鳥道過百
丈金身開翠壁萬龕燈焰隔烟蘿雲生客到侵衣濕花
落僧禪覆院多不與方袍同結社下歸塵世竟如何李
習凌雲漫興云古寺臨江間碧波石梯深入白雲窠僧

房寂寂無人跡滿地落花春又過薛濤寄題凌雲寺上
韋相公詩聞說凌雲寺裏苔風高日近絕塵埃橫雲點
染芙蓉壁是待詩人寶月來黃庭堅凌雲記游詩凌雲
一笑見桃花三十年来始到家從此春風春雨後亂隨
流水到天涯陸游凌雲禮佛詩山郭尋幽一笑新旋呼
艇子截煙津不辭疾步登重閣聊欲今生識偉人泉鏡
自涵螺髻綠浪花不犯寶趺塵始知神力無窮盡丈六
金身小果身自註云一泉泓然正在髻下每歲水漲不

能及佛足 碑目云凌雲山麓有唐放生碑山頂有清
音亭邵博記天下山水之勝在蜀蜀之勝在嘉州嘉州
之勝在凌雲寺寺之南山又其勝也蘇子瞻名其亭曰
清音又南山之勝也其下有治易洞東坡磨厓大字云
聖作易晦其數劉傳吳識易祖蓋宋郡守吳秘得之於
劉牧耳 紀勝云烏尤山一名離堆山在九頂山之左
舊名烏牛突然水中作犀牛狀至山谷題涪翁亭始
謂之烏尤又名烏龍碑目云郭璞移水記謂世主播遷

兵戈滿地於是優游嘯傲放意山水間乃於嘉州城東
百步烏龍山鑿書嵒而蘇子由詩亦指其注爾雅於此
史謂璞無入蜀之文按移水記有嘉州二字則碑非璞
手筆恐後人之附會耳蓋嘉州之名始於後周而自周
已前止曰漢嘉郡曰龍游縣耳安得有所謂嘉州哉子
由詩云巉巉九頂峰可愛不可住飛舟過山足佛脚見
江潯俄頃已不見烏牛在中渚移舟近山陰峭壁上無
路云有古郭生此地苦箋註洗硯去殘墨遍水如黑霧

至今江上魚頂有遺墨處提刑張方詩竹橋沙水度烏
尤絕壁孤巖意氣驕故與凌雲分半坐僧窻假寐見金
焦以其似金山焦山也 青衣石峽循而東去東觀漢
記曰元初二年五月青衣蠻唐律歸義注云地在大江
青衣二水之會今嘉州龍游縣也寰宇記云青衣津在
治南四十里有青衣神益州記云神號雷堽廟即華陽
國志之雷垣也班固以為離堆下有石室名玉女房盖
此神耳岑參上嘉州青衣山中峰題惠淨上人幽居寄

兵部楊郎中詩引云青衣山在大江之中屹然迥絕崖
壁蒼峭周廣七里長波四匝有惠淨上人廬於山巔惟
繩牀竹杖而已恒持蓮花經十年不下山予自公浮舟
聊一登眺友人夏官弘農楊侯清淡之士也素工為文
獨立於世與余有方外約每多獨往之意今者幽躅勝
槩歎不得與此公俱爰命小吏刮磨石壁以識其事乃
詩以達楊友爾詩云青衣誰開鑿獨在水中央浮舟一
躋攀側逕緣穹蒼絕頂詣老僧豁然登上方諸嶺一何

小三江奔茫茫蘭若向西開我眉正相當猿鳥樂鐘磬
松蘿泛天香江雲入袈裟山月吐繩牀早知清淨理久
迺機心忘尚以名宦拘聿來夷獠鄉吾友不可見鬱為
尚書郎早歲愛丹經留心向青囊渺渺雲智遠幽幽海
懷長勝賞欲與俱引領遙相望為政愧無術分憂幸時
康君子滿天朝老夫憶滄浪況值廬山遠抽簪歸法王
或云青衣即烏尤山然烏尤之廣不能以七里計也

方輿記云東巖在城東佛峽即聖岡山薛能詩古蹟是

何王平身入石房遠林通後逕一郡隔前岡晝靜惟禪
客春來有女郎獨醒回不得無事可焚香巖半有洞出
泉宜釀東坡詩一時付與東巖酒即此陸務觀詩能仁
院前有石像高丈餘蓋作大像時稿也詩云江閣欲開
千尺像雲龕先定此規模斜陽徙倚空三歎嘗試成功
自古無 碑目云東津院有黃魯直草書圓照大師小
碑其詩云赤旃檀塔六七級白菡萏花三四枝禪客相
逢以彈指此心能有幾人知又云黃太史自叙南經此

有所作墨竹記 予觀嘉州新志城西一里有楊雄山
石洞幽邃相傳以為子雲遊此有子雲草亭蔡植詩云
獨步城西路蕭條一草亭古苔環徑碧修竹遶軒青石
鑿觀書所碑鐫陋室銘草玄今已矣千載想儀刑東北
四十里有麻平河流出千佛崖與泥溪合王勃麻平曉
行詩云百年懷士望千里倦遊情高低循戍道遠近聽
泉聲礧葉纔分色山花不辨名霸心何處盡風急暮猿
清泥溪詩云弭棹臨奔壑低鞭躡峻岐江濤出岸險峰

磴入雲危溜急船紋亂崖斜騎影移水煙籠翠渚山照
落丹崖風生蘋浦葉露泣竹潭枝泛水雖云美勞歌誰
復知

我眉縣

任豫益州記云我眉山在南安縣界兩山相對狀如我
眉張華博物志以為牙門山也本傳云昔善財禮德雲
比丘時佇立妙高峰觀此山如初月現故稱我眉李
膺益州記云隋開皇九年立我眉縣以山為名縣在南

安之西峨眉之東唐乾元間獠叛移就峨眉觀東今縣
理是也 禹貢梁州之山四岷嶓蔡蒙西山皆岷北皆
嶓南山皆蒙峨眉之在禹貢則蒙山之首也 飛玄羽
經曰峨眉之山金臺之室飛玄羽經秘其內稽神樞云
句曲洞天西通峨眉皆大道也其間有小徑雜路阡陌
抄會非一處華陽國志云峨眉孔子地圖言有仙藥
漢武帝遣使者祭之欲致其藥不能得碑目云宋太宗
峨眉山普賢殿簡版書天真皇人論道之地楚狂接輿

隱迹之鄉按雜花經云諸佛如來以大悲心而為體故
因於衆生而起大悲因於大悲生菩提心因菩提心成
等正覺故我世尊等正覺而有方所說經而有道場普賢
於道場開化人天等衆故現相海於我眉山中密引世
人而通菩提覺性 三皇經云皇人者泰帝之所使在
我眉山黃帝往受真一五牙之法 費士殘歌鳳臺記
云按晉皇甫謐高士傳葛洪神仙傳宋劉孝標注世說
皆以接輿為避楚入蜀隱於我眉山不知所終也 寰宇

記云中峩山在峩眉縣南二十里又名覆蓬山有葛仙洞入穴初纔容人行數里漸寬洞中蝙蝠大如箕小峩山在峩眉縣南三十里一名鐔刃山山有李仙洞是為三峩 李膺益州記云龍門山在峩眉西十里兩崖峭峙其形如削仰視青天纔餘一罅又云峩眉山下有池廣袤十里號龍池 方輿記云綏山廢縣在峩眉縣西四十里按列仙傳葛由周威王時人好刻木為牛賣之一日騎木牛見人蜀中王侯追之上綏山綏山在峩眉山

西南其高無極隨之者不復還皆得仙道諺曰得綏山
一桃雖不得仙亦足以豪 水經注云我眉山有濛水
即大渡水也水發蒙漢東南流與泚水合逕汶江道呂
忱曰泚水出蜀許慎以為泚水也從水泚聲南至南安
入大渡水大渡水又東入江 通志云羅目河出我眉
山麓右溪自小天池以東左溪自黃毛坪以北至羅目
廢縣界合二溪之委為江水石甚竒怪縣址去治西九
十里唐麟德置宋省入 寰宇記云隴寧山在羅目縣

東南七里神仙傳云宿山圖者隴西人也採藥此山服之羽化 又云嘉樹在羅目縣東南三十里陽山江溉兩樹對植圍各三二尺上引橫枝亘二丈相援連理陰庇百夫其名曰黃葛號嘉樹蘇子由詩予生雖江陽未省到嘉樹即此 又云夷惜水在羅目縣東北五十里源出雋州界中有嘉魚長三尺每年二月隨水而下八月逆水而上入穴蜀都賦云嘉魚出於丙穴是也 予按名山記我眉山周匝千里石龕百一十二大洞十二

小洞二十八南北有臺凡遊大我者自縣勝峰門出至
華嚴院恰十五里前代於我眉山勦寺六光相居山絕
頂為遊山之底極華嚴居山之前峰為遊山之嚮導而
白水寺居其中自白水至光相歷八十四盤山徑如線
如是者六十里至峰頂即普賢示現處屋皆以板為之
予以萬歷辛亥歲遊是山作記云出嘉州之西門為
我眉徑而我愈用自遠遇津焉絕流者二揭衣者一既
入縣縣田食堰水膏液雲油有沃益之稱遇嶺焉閣覆

於上宋時建魏華父書也首坡名解脫以出山者釋危
就坦至此而盡噫予惡知乎出解脫入解脫耶過此為
華嚴寺即華嚴堠為純陽殿殿前潁溪有石如船水出
灌堰石上龍門二字蘇子瞻書又過為中峰寺即乾明
觀黃魯直居之為歌鳳臺列仙傳所稱楚狂接輿隱於
我眉山中不知所終也陳希夷福壽字殊俗筆哉石神
水亦亡謂又過為雙飛橋山中橋非一此可稱橋一橋受一
水一水自一洞來有黑白之分若挾而舞若搏而

赴勢不相下過橋始狎久之乃濟有石狀如牛心受水
所激而成有前後牛心寺前者白水而後者黑水也謂
之符文水孫思邈居於白水今之萬年寺即白水寺由
山下至寺一舍而遙倍之而近如循牆自牖以達堂窅
每遇一嶺輒如止扉寺前為四達而內則大宮也其地
皆稻田塍埒俯仰隈隩氣候和暖不異於外有蒲氏村
蒲人居之云漢蒲公之後蓋權輿是山爾出寺至明月
池俗名初喜亭其嶺蔓延行之無盡石磴難數始治終

亂騎已絕輿用二十許人舁蹲處於內不能蔽軫劣似
輿形者耳首十人不任輿以舟視輿背如弓繩如絃猶
不滿輿者意左右八人翼伸縮如猿臂莫知定向輿首
者察路如察脉常苦眩次者如眩師或亟跳出輿外或
僂入輿內或同前後左右為一井計二十人之形如鴻
雁木葉偶成文字莫知所以又或作十數層如懸線或
擁腫一處如木癭也輿不可以足代足不可以手代扶
予行者不善地以善讓於予善在左則棄右者善在右

則棄左者亦有時而下下不十上之一與相詬厲彌甚
首者拊不任輿者背如相瞽然留十數人後後者躡石
石隨足下擊前者足驚全輿前者交平地欲趣後者未
脫險不能從出初喜亭至化城寺俗名木皮殿徑一嶺
狹束如溝水所流注多磊砢善脫足謂之滑石溝也由
木皮殿至雷洞坪行者禁聲有禁聲碑輿二十人他輿者
半共百五十人俱行篋篠灌莽中若不相顧若夢與人
語而人不應其木連困糾紛或寓或族或相切磨或自

什死或翹繚而句或無枝而檄每上一巔不能半望若
青天則有樹立於旁為客繇役而惺盱也木皮殿以上
磴不能石疊木如馬齒雷洞坪以上樹不能枝向空如
虎爪由雷洞坪至天門石路詰曲為八十四盤峭直纔
減半梧丘當途或出其前或出其後又或出其左右而
還之輿者實則輿向空久始實輿者空則輿趾礪地有
聲而過門以外為娑羅坪娑羅其葉冬青其花薝蔔其
色赤白木皮殿以上皆有之然有雜樹故不之稱稱天

門天門樹娑羅三之二松居其一有一樹枯而復榮定
者居之將合無迹也門內有橋曰天橋有井曰井絡有
臺曰光相臺有鐵瓦殿昔建有銅殿今建有菴以棲禪
者予登乎臺焉其穆穆肅肅者耶其明明斤斤者耶其
見乎蒼蒼之色不在穹窿者耶其於世也悠悠洋洋者
耶前之岷江大出而尾下也背之瓦屋上正而平章也
遠之雪山瀟浮而汨沒也予何以知朱明之別於玄英
又何以知臯且之別於辜涂何以知霾曠霽霖之相終

始何以知蟠螭挈貳之自消息又何以知今日覆雲之
不為暈氣五采耶又何以知人世之雕繪而繡錯目眩
而心亂者之有異乎此耶噫觀止矣學佺曰予遊名山
多矣直上百里無所因緣則未之聞見也高出五嶽秀
甲九州天竺先生之言也楚人李維楨述於臺側李公
本寧前予守西川也陳子昂感遇詩金鼎合神丹世
人將見欺飛飛騎羊子胡乃在我眉變化固非類芳菲
能幾時疲痾苦淪世憂悔日侵溜眷然顧幽褐白雲空

涕洟又浩然坐何慕吾蜀有峨眉念與楚狂子悠悠白
雲期時哉悲不會涕泣久漣洒夢登綏山穴南采巫山
芝探元觀羣化遺世從雲螭婉孌時永矣感悟不見之
李白峨眉山詩蜀國多仙山峨眉邈難匹周流試登覽
絕怪安可恚青冥倚天開彩錯疑畫出冷然紫霞賞果
得錦囊術雲間吹瓊簫石上弄寶瑟平生有微尚歡笑
自此畢煙容如在顏塵累忽相失儻逢騎羊子攜手凌
白日鄭谷峨眉山詩萬仞白雲端經春雪未殘夏消江

峽滿晴照蜀樓寒造境知僧熟歸林認鶴難會須朝闕
去祇有畫圖看賈島送譚遠上人下視白雲時山房掛
樹皮垂枝松落子側頂鶴聽棋清淨從沙劫中終日未
歇金光明本行同侍出我眉釋皎然思遊我眉寄林下
諸友詩剛有我眉念秋來錫欲飛會拋湘寺去便逐
蜀帆歸難世堪言善間人合見機殷勤別諸友莫厭楚
江薇曹松送僧入蜀過夏詩師言結夏入巴峰雲水回
頭幾萬重五月我眉須近火木皮嶺上祇如冬薛能咏

我眉聖燈詩莽莽空中稍稍銓坐看迷濁變清澄須知
火盡烟無益一夜闌邊說向僧 予有前後我眉二歌
前我眉山歌金陵為松谷上人作云我眉山上月千里
若為看我眉山上雪萬古逼人寒山青如黛雪如粉明
月鏡中何隱隱雙峰縹緲誰畫眉挂在長空不可盡西
域雪山絕嶙峋此中應見西方人普賢菩薩行具足三
千徒衆皆應真始信我眉自惆悵不作巫山神女身八
十四盤娑羅樹花開如繪復如素一間版屋千重嶺正

值行人問山路登山路轉難投寺日已晚古苔如髮長
新松學蓋偃冰窟炊不成雷洞眠難穩真僧入定久行
脚乞食遠鉢裏龍形小竈前鳥聲轉雨氣沉如墨雲光
疾似電應有千化身故作百寶現橋梁宛虹架樓臺疑
蜃變天竺皆騎象星光盡散燕奕奕九微燈焚焚五色
線人人為攝受各各覩顏面欲知色是空色即空中滅
世事如幻影詎必歎奇絕依舊我眉山明月照清徹君
來白門秋山月幾圓缺浩浩江水流尚帶我眉雪後

遊我眉歌云君不見太行誠險阻西蜀我眉羞與伍又
不見雪嶺長晶瑩來映我眉一段青禹貢蒙山此稱首
梵語勝峰傳日久洞天列在位之七秀色甲乎州有九
君不見軒轅氏跪謁皇人叩玄旨又不見鬼谷子著書
琅球藏洞裏隴西仙人宿山圖採藥山中顏色殊葛由
賣羊從此去接輿歌鳳胡為乎君不見子規啼處竇誼
悲夜啼竹裂人不歸又不見崑崙伯仲未可分逸少曾
詢周撫軍唐家子昂稱詞伯青蓮居士李太白往往

見諸吟詠間白頭欲返青山宅豈是峨眉善妬人江水
茫茫難問津我今來遊亦偶爾不然惆悵蜀國將三春
三春花已謝木冰猶未嫁五月披重裘四時無一夏安
羅鬪雪開松枝受風亞仙僧如故常客子驚云乍乍見
甚遲迴人生不再來足篆符文水身居光相臺井絡金
莖下天門玉藥開願言獻北極千秋萬歲杯

夾江縣

青衣水來遶縣界而飛水溪注之溪源出瀑布泉狀如

素練李太白所謂瀑布天落半與銀河爭流者耶而鳳凰天馬虎履伏龜諸山或舞或翥或蹲或處左右而挾持之過當縣城下稍平坦宋謝達夫詩兩峰懷抱揖平川張孝芳詩平川麥穗藹如雲過此而東南三十里乃作簾鉤之狀晉張神君所謂日移紅影在簾鉤者此也道書云平岡化依鳳凰山亦謂之依鳳岡及桐梓林山下有石湫門及石筍雷柱可以禱雨在縣南十里通志云天馬山其勢飛騰似天馬一日馬鞍山在縣東

二十里 形勝志云青衣水遶於南黑虎山峙於北

福地記云伏龜山有仙掌洞相傳李阿真人所遺宋人

書其壁云跨龍門飲蟹泉摩仙掌扣丹竈矣 本志云

治西二十五里南安鎮即漢南安縣治有鄧通宅故址

前有瑪瑙溪中有磐石可以修楔 寰宇記云夾江縣

本漢南安縣地即封宣虎為侯之邑隋開皇中分龍游

平羌二縣置於涇上臨江水故號夾江按涇水昔秦惠

王得蜀移秦人萬家以實之秦人思故鄉水乃呼此水

為涇水也唐天寶六年改為秦水史記年表宣虎以破
臧荼功食邑於此 碑目云漢和帝時開道碑在夾江
縣西青衣越雋道界中有永和七年永和八年等字

又云漢楊宗楊暢墓在夾江縣東十里墓前兩闕其左
右皆隸書縣按縣東二十里漢川縣界有亭亭內碑二
通前立二石柱一云漢故益州太守楊府君諱宗字德
仲墓道一云漢故中宮令楊府君諱暢字仲普墓道皆
隸書大字 予按揚雄賦云五兀參差左太冲賦躡五

全川通志 卷十一
岷之蹇澹本志以為縣之址隅五兀山 後漢書費貽
宅著草生焉常有五色雲氣覆其上貽蓋不屈於公孫
述者健為郡之夾江人

洪雅縣

離堆川流東西屈曲百三十里而後入大江所謂洪雅
川也 碑目云古夷獠誓碑在洪雅縣市中又云漢靈
帝時張道陵碑在洪雅之易俗鄉有嘉平二年三月一
日等字 此縣之十里修文山山即雅江所注驚湍怒

濤名曰龍潭漁者不敢入 又二十里其地多竹為竹
筓山石甃梯磴盤折而上唐宋所設也 又十里為隱
蒙山晉處士龐居正字隱蒙隱此 又二十里為花溪
發源自瓦屋山與青衣合可望雪嶺積雪經年不化范
忠宣詩雲堆雪嶺鋪銀界日射金仙照碧津 又二十
里思經山則與雅安分界矣山趾有廢嚴道縣基其上
阿叱山瀑布千仞響撼山谷有巨石上鐫羅漢一百有
八 縣之東南有金釜山下臨平羌江古老相傳昔有

主簿於此煉金丹故曰金釜山亦名主簿山

犍為縣

左思蜀都賦東越玉津註云江出璧玉故名華陽國志
蜀有七津之一也今之犍為縣兼有玉津縣矣陸務觀
舟過玉津詩玻瓈江上送殘春疊鼓催帆過玉津宋白
為玉津令貽田表聖詩玉津縣裏三年悶金粟山前九
月愁又云竹裏衙人吏花間押簿書 今縣治在沉犀
山上寰宇記云昔有犀牛渡到此上沉一名沉犀灘志

云沉犀洞在沉犀山下上有赤壁數丈下有玄水千尺
縣有石人蜀記云昔諸葛亮征蠻中十里刻一石人
今黎嶠之路尚有存者陳羽城下聞夷歌詩犍為城下
牂柯路空冢灘西賈客舟此夜可憐江上月夷歌銅鼓
不勝愁郭璞記云犍為縣北百里書樓山是孔子背
書樓本志云子雲城在縣南三十里昔楊子雲避亂
於此後人增築為城今水月寺是其故址俗謠為紫雲
城碑目云孝女碑在犍為縣清溪口楊洪山下東漢

永建初孝女叔先雄以父尼和墜湍水尸喪不歸於溺處自投水死後五日與父屍相持浮江上郡表言為雄立碑宋元祐中重立本志云清水溪在縣南十里流至孝女渡入江 神異傳云趙昱嘗隱青城山隋煬帝起為嘉州太守時犍為潭中有老蛟為害昱率甲士千人夾江鼓譟持刀入水有頃江水盡赤昱左手執蛟首右手持刀奮波而出隋亂隱去不知所終後嘉州水漲人有見昱青霧中騎白馬從數獵者於波面過宋太宗封

神勇大將軍廟食灌江口 碑目云健為縣東南四十
里有唐大佛寺寺中菊坡二大字乃袁天綱筆 通志
云宋邵博墓在健為縣博為制置司叅議卒葬於此本
志云康節嘗言世亂惟蜀可居宣和末伯溫攜家入蜀
止於嘉州今健為之紫雲城是其故業矣 杜甫宿青谿
驛奉懷張員外十五兄之緒詩漾舟千山內日入泊荒
渚我生本飄飄今復在何許石根青楓林猿鳥聚儔侶
月明遊子靜畏虎不得語中夜懷友朋乾坤此深阻浩

蕩前後間佳期付荆楚自註云青谿驛在嘉州犍為縣
崔塗秋日犍為道中詩久客厭岐路出門吟且悲平生
未到處落日獨行時芳草不長綠故人無重期那堪更
南渡鄉國已天涯范成大犍為江樓詩河邊堵立看歸
蓬三老開頭暮欲東漲水稠灘連峽內淺山浮石似湘
中無人驛路榛榛草有客江樓浩浩風種落塵消少公
事賸裁新語寄詩筒蘇軾犍為王氏書樓詩樹林幽翠
滿山谷樓觀突兀起江濱云是昔人藏書處磊落萬卷

今生塵江邊日出紅霧散綺牕畫閣青氛氲山猿悲嘯
谷泉響野鳥嘒憂巖花春借問主人今何在被甲遠戍
長苦辛先登搏戰事斬馘區區何者為三墳書生古亦
有戰陣葛巾羽扇揮三軍古人不見悲世俗回首蒼山
空白雲

威遠縣

縣有中峰峰巒峭拔又有中溪溪水幽清寰宇記云東
十五里葛仙山古志相傳葛仙翁曾遊其地志云舊設

觀仙臺碑刻剝落矣 山居錄云威遠李圃淳熙中以
忠州別駕歸隱白茅山中築秀發齋吟咏自適齋銘曰
前山特秀入我牕戶朝來爽致起我幽趣望天宇之澄
明何迷途之獨悟揅頤終日為蝶為周兩忘之矣聊舉
扇以自障豈世塵之能汚行歌山中採其薇矣雲外飛
鴻悠然來去而弋人何慕哉

榮縣

蜀地不宜松而榮州之松獨著紀勝曰榮黎松樹如龍

盤陸游詩柵根橫走松倒植故擅有其奇狀矣 曰榮
黎曰榮隱曰榮德所謂三榮也寰宇記云榮黎山在州
東十五里山上有龍池池邊有松如盤龍竹亦有如龍
形者俗謂之羅漢杖碑目云榮黎山古寺碑唐元和禱
雨碑俱在本山 紀勝云榮隱山在州西三十里一名
石筠無名氏石刻云筠山高極入穹蒼人道虎為殃行
人過此不曾傷咸陽宮闕在平地高鹿食人無數計吁
嗟苛政猛於虎斯言垂萬古古有榮隱先生修道於此



石室猶存碑目有榮隱山修道觀石碑 方輿云榮德
山在州東北四十二里州以此得名其山在谷中獨拔
五百餘丈中有希夷觀老君祠刻石為像有小路至山
巔以木為梯半山有唐刺史薛高邱磨崖碑碑目云開
元二十年刺史薛高邱立多載仙靈事今已磨滅本志
云榮德山為陳搏修真處又名希夷山有石室二十四
及龍池千葉蓮 唐劉兼初至郡詩嘉陵江畔接榮川
兩岸旌旗下瀨船郡印已分炎瘴地朝衣猶惹御爐烟

蓮塘小飲香隨艇月榭高吟水壓天錦宇莫嫌歸路遠
華夷一統太平年又有去年今日詩云去年今日到榮
州五騎紅塵入郡樓貔虎只知迎太守蠻夷不信是儒
流奸豪已息時將泰疲瘵全蘇歲又周聖主若容辭重
祿便歸烟水狎羣鷗 碑目有唐貞元二年建榮縣碑
今移植於東橋有榮州院碑偽蜀司倉參軍苟延慶撰
本志云蓮宇山在學宮後有宋人九域圖碑城東桂林
山舊縣學有衡陽王書文明碑 碑目又云真義侯碑

在本廟唐元和二年遷舊經云即古蜀將獨孤白馬二人
廟也又云大周聖德勒石碑在州衙子城門外長安三
年韋縠撰文 劉兼登郡樓詩偶奉綸書蒞旭川郡樓
佳致盡依然松歌鳥道雲藏寺月滿漁舟水浸天望帝
古祠花簇簇錦城歸路草芊芊有時倚檻垂雙袂故國
風光似眼前 陸務觀自序其詞云三榮郡治之西因
子城作樓觀曰高齋下臨山村蕭然如世外予留十日
被命參成都戎幙而去臨行徙倚竟日作桃源憶故人

一首所謂衰翁老去踈榮利絕愛山城無事也 城北
有橫溪閣務觀閣上小宴沁園春詞引云橫溪閣者跨
於雙溪之上也一自西來其水濁一自東來其水清二
水合流於城下為閣以頴之其北鳳鳴山則黃魯直所
題榮川祖無大師此君軒在焉紀勝云鳳鳴之竹多茂
實言此竹結實有鳳來棲也魯直詩云王師學琴三十
年響如清夜落澗泉有酒如澠客滿門不可一日無此
君當時寺栽數寸碧聲挾風雨今連雲此君傾蓋如故

舊骨相竒怪清且秀程嬰杵白立孤難伯夷叔齊采薇
瘦霜鐘堂上弄秋月微風入絃此君說君家周彥筆如
椽此君語意當能傳 勝覽云龍洞在州東南四里真
如院巖穴峭深洞左石壁竒聳巨栢老蒼洞右有石角
立舊經以為孫登嘯臺三者乃榮之勝處陸游詩嘯臺
載酒雲生履仙穴尋梅雨墊巾碑目云嘯臺磨崖記宋
隆興元年端午日榮守太史公李燾仁父書 予攷諸
傳記所載榮雖山谷間實為郡國一都會青陽門記云


榮州有青陽洞以少昊國在其北門今正臨之故名按
史黃帝子元囂封於青陽國為少昊金天氏少昊降居
江水國於青陽以金德王位在西方集覽云江水在蜀
青陽是也 宋崔仰之送人牧榮州詩山色臨巴迥江
流入漢清 志云邑東榮川即古遯水河岸有竹王祠
盖以祀夜郎王者蜀記云昔有女人於溪浣紗有大竹
流水上觸之有孕後生一子自立為王以竹為姓漢武
使唐蒙伐牂柯斬竹王土人不悉其本立竹王廟歲必

祠之不爾為人患薛濤題竹郎廟云竹郎廟前多古木
夕陽沉沉山更綠何處江村有笛聲聲聲盡是迎郎曲
漢地理志云縣有滇池周迴三百里水出駿馬日行
五百里事同大宛又有馬鳴戍益州記云漢刺史韋拔
夜過此地聞神馬嘶漢中馬嘶以應之故有此戍 成
都市九州要記云和義郡古夜郎之地武帝時開南中
使犍道令通犍青衣道無功唐蒙將殺之令曰恨不見
成都市而死蒙即立市如成都以殺之故曰成都市按

和義郡本屬瀘州寰宇記云唐貞觀八年割屬榮州

志云城西清富山有古榮王府按周榮公封國之後唐
憲宗封其子贍宋真宗封子德雍孝宗封子光宗寧宗
封子曦俱曰榮王縣舊有綾錦村杏春村皆宋藩封故
迹也 朝野雜記天子即位嘗所領州鎮自防禦州而
下皆陞軍名若節鎮州則建為府光宗自榮州刺史進
封榮王而榮州不錫軍名蓋中書之誤也南渡後始陞
為紹興府 宋名臣傳載李昉為國子直講求郡晨登

講席諸生見畋巾兩焰火起是日報得榮州蓋當時亦甚重之矣



蜀中廣記卷十一

欽定四庫全書

史部

蜀中廣記卷十二至

詳校官編修臣翟槐

編修臣程嘉謨覆勘

總校官庶吉士臣何思鈞

校對官學正臣陳本

謄錄舉人臣羅允文

欽定四庫全書

蜀中廣記卷十二

明 曹學佺 撰

名勝記第十二

上川南道

眉州

賈島送穆少府知眉州詩劍門倚清漢君昔未曾過日暮行人少山深異鳥多狄啼知峽雨棧盡到江波一路

白雲裏飛泉洒薜蘿李頻眉州別李使君詩回首雪峯
前朱門心杳然離人自嗚咽流水莫潺湲毒草通蠻徼
秋林近漏天一生從此去五字有誰憐薛濤送鄭眉州
詩雨暗眉山江水流離人掩袂立高樓雙旌千騎駢東
陌獨有羅敷望上頭趙抃按獄眉山舟行詩攜琴曉出
錦官城千里秋原一望平放舸急流身覺快披雲孤嶼
眼增明農田雨後畦畦綠漁笛風前曲曲清訊獄遠邦
先滌慮卹哉休戚在民情蘇軾寄黎眉州詩膠西高

處望西川應在孤雲落照邊
瓦屋寒堆春後雪峨眉翠
掃雨餘天治經方笑春秋學
好士今無六一賢且待淵
明賦歸去共將詩酒趁流年
黃庭堅次韻子瞻寄眉山
王宣義詩叅軍但有四立壁
初無臨江千木奴白頭不
是折腰具桐帽棕屨稱老夫
滄江鷗鷺野心性陰壑虎
豹雄牙鬚鸛鵲作裘初服在
猩血染帶鄰翁無昨來杜
鵑勸歸去更得把酒聽提壺
當今人材不乏使天上二
老須人扶兒無飽飯尚勤讀
婦無複禪且著襦社甕可

漉溪可漁更問黃鷄肥與癯林間醉着人伐木猶夢官
下聞追呼萬釘圍膏莫愛渠富貴安能潤黃壚 郡有
孫氏書樓魏了翁記曰孫氏屈眉以姓著自唐迄今人
物之懿史不絕書而為樓以儲書則由長孺始樓建於
唐之開元至光啓元年僖宗御武德殿書書樓二字賜
之今石本尚存自偽蜀毀於災乃遷魚鰕其屈為佛氏
所廬今所謂傳燈院是也若里巷則固以書樓名長孺
之五世孫降衷嘗遊河洛識藝祖皇帝於龍潛建隆初

召至便殿賜衣帶圭田特授眉州別駕因市監書萬卷以還然樓尚未復也別駕之孫闢乃入都傳東壁西雖之副與官本市書捆載而歸即所居復起重樓藏之魚鰕之有樓則昉乎此又嘗除塾為師徒講肄之所號山學於是士負笈景從而書樓山學聞名於時矣方樓之再建也在天聖初闢之從兄直講君堪嘗為作記錢內翰希白宋景文子京皆賦詩闢性倜儻不耐衣冠衣方服其卒也從弟文懿公為識其寢有不儒其身而儒其

心之語故里人又以儒心名之比歲樓又燬於火書僅有存者儒心之六世孫曰某懼忝厥世乃更諸爽塏以唐僖宗所書樓刻揭之樓視舊增拓焉且病所儲之未廣走行闕下傳抄貿易以補闕遺竭其餘力山學載興以余二十年雅故請書厥顛末余因惟昔人藏書之盛鮮有久而弗厄者梁隋之盛或壞於火或覆於砥柱唐太玄文昭之盛或毀於盜或散於遷徙本朝之初如江源叔所藏合江南吳越之書凡數萬卷而子孫不能有

之為臧僕盜去與市人裂之以藉物者不可勝數余偶過安陸亦得其省中所藏晉史則佚於他人者可知安陸張氏得江書最多其貧也一篋之富僅供一炊王文康初相周世宗多得唐舊書李文正所藏亦為一時之冠而子孫皆不克守宋宣獻無有畢文簡楊文莊二家書可敵中秘之藏而元符中蕩為烟埃晁文元累世之蓄校讐是正視諸家為精自中原無事時已有火厄至政和甲午之災尺素不存劉壯輿家於廬山之陽所儲

亦博今其子孫無聞焉南陽尹氏積書凡五十篋則盡
歸諸晁氏嗚呼斯非天地神人之所靳者耶而孫氏之
傳獨能於三百年間屢絕而復興則斯不亦可尚矣夫
雖然余嘗聞長老言書之未有印本也士得一書則口
誦而手抄惟恐失之其傳之艱蓋若此惟傳之艱故誦
之精思之切辨之審信之篤行之果自唐末五季以來
始為印書極於近世而閩浙庸蜀之鋟梓徧天下加以
傳說日繁萃類益廣大綱小目彪列臚分後生晚學開

卷瞭然苟有小慧纖能則皆能襲而取之噫是不過出
入口耳四寸間爾若聖賢所以迭相授受若合符節者
果為何事而學之於人果為何用則謾不加省然則雖
充厨牝几於我何加焉可不甚懼矣夫按書樓復興雖
在魚鰕江而始初則在州城也今蜀中書賈之家往往
稱書樓盖本諸此 有石氏畫苑蘇軾記曰石康伯字
幼安眉之眉山人故紫微舍人昌言之幼子也舉進士
不第即棄去當以蔭得官亦不就讀書作詩以自娛而

已不求人知獨好法書名畫古器異物遇有所見脫衣
輟食求之不問有無居京師四十年出入閭巷未嘗騎
馬在稠人中耳目謾謾專求其所好長七尺髯而黑如
世所畫道人劍客而徒步塵埃中若有所營不知者以
為異人也又善滑稽巧發微中旁人抵掌絕倒而幼安
淡然不變色與人遊知其急難甚於為己有客於京師
而病者輒舁置其家親飲食之死則棺斂之無難色凡
識幼安者皆知其如此而余獨深知之幼安識慮甚遠

獨口不言耳今年六十二狀貌如四十許人須三尺郁
然無一莖白者此豈徒然者哉為亳州職官與富鄭公
俱得罪者其子夷庚也其家書畫數百軸取其毫末雜
碎者以冊編之謂之石氏畫苑幼安與文與可遊如兄
弟故得其畫為多而余亦喜其畫古木叢竹因以遺之
使置之苑中 有三蘇祠在紗線街即蘇氏故宅也門
前榆樹云老泉手植奇恠礪礪人爭取去為假山魏了
翁知眉時祭公文曰眉號士大夫郡聖天子不以某不

肖真守此土其在境內凡百辟卿士有益於民夙夜承
祀無忒矧惟山川炳靈世載蘇氏一翁二季先後相望
文章事業在太史之典策今居郡滿歲顧歲時奉嘗闕
然弗諧非所以風境律我有民也用修圭薦展於廡下
以內翰太師文忠公黃門太師文定公從祀既齊既稷
神保攸歆敢不永與多士承斲斯文以無忘德 有觀
蓮亭在祠西池中環臺皆蓮中有碑刻東坡小像李龍
眠畫山谷頴濱贊今移入寢 方輿勝覽云臨風閣在

州治內宋沈迥詩烟霞生座右林沼匝城隈州園十詠
邵博著環湖在署後魏了翁築翠羽書臺遠景樓在州
治北太守黎錞建蘇軾記通志云雪臺在遠景樓前亦
希聲築本志云東北二里有洛城後漢時築蜀漢廢
齊通城在城北南齊建武置隋開皇廢碑目云唐眉州
初羅城記大順二年盧拯撰文畧云象耳鎮於後義眉
列乎前勝覽云嘉祐閣枕羅城繪三蘇於上刻東坡和
陶詩於壁間宋史唐末山行章攝眉郡守值四方驛騷

乃合五縣之力築城周遭八里有奇計一千八百六十
五丈名卧牛城淳化中李順之變攻圍不下及順誅守
者以城完受賞焉 通義志云昔人評吾州山不高而
秀水不深而清列眉通衢平直廣衍夾以槐柳綠陰翳
然小南門城村家多竹籬桃樹春色可愛橋之下流皆
花竹楊柳泛舟其間鄉人謂之小桃源蘇子瞻詩清江
入城郭小圃生微瀾子由詩彷彿城南路繁香撲市橋
通志云醴泉山在治西八里環繞州城山半有八角

井清甘如醴松江在治東南自蜀江分派西南流至州
城與醴泉江合方輿云蜀江在城外一名玻瓈江水
色清澈似之陸游詩云玻瓈江水千丈深不如江上離
人心君行未過青衣縣妾心先到峨眉陰金尊共釀不
知曉月落烟渚天橫參車輪無角留不住馬蹄不方何
處尋空憑尺素寄幽恨縱有綠綺誰知音愁來只欲掩
屏睡無奈夢斷聞疎砧范成大和云玻瓈江頭春流深
別時云云流到今祇言日遠易排遣不道相思翻苦心

烏頭可白我可去
菖花易青君易尋
人生若未免離別
不如碌碌無知音
蘇軾送楊孟容詩
我家峨眉陰與子
同一邦相望六十
里共飲玻璃江後
人因立共飲亭又
改為江鄉館在津
口矣陸務觀詩玻
璃江上柳如絲行
樂家家要及时只
怪今朝空巷出使
君人日宴墓頤墓
頤山在江東七里
狀如墓頤因名有
至德觀有爾朱洸
丹泉傳記所載以
為軒轅氏丹宅山
腹有穴曰龍洞傳
者以為四目老翁
唐未有楊太虛得
道於此今祠中有

三仙象四目居中焉人日出東郊渡江遊墓頭山眉之
故事也春風樓明霞閣俱在山上 蜀檇杌云僖宗幸
蜀政事悉出內侍田令孜之手左拾遺孟昭圖上疏論
事坐貶令孜遣人投之墓頭津後人為立祠裴澈詩云
一章何罪死何名千載惟君與屈平從此蜀江烟雨夜
杜鵑應作兩般聲本志云孟拾遺祠在墓頭山上今廢
志又云老翁泉在墓頭山東二十里蘇明允嘉祐集
云十數年前月夜有一老翁蒼頭白髮偃息泉上就之

則隱而入於泉洵甃以石建亭覆之而為之銘曰山起
東北翼為南西涓涓斯泉湔湔以彌飲以為井可飲萬
夫里無斯人將此為誰山空寂寥或嘯而嘻更千萬年
自潔自好誰其知之乃訖遇我惟我與爾將遂不泯無
竭無濁以永千祀梅聖俞寄蘇明允詩泉上有老人隱
見不可常蘇子居其間飲水樂未央淵中必有魚與子
自徇羊淵中苟無魚子特翫滄浪日月不知老家有雛
鳳凰百鳥戢羽翼不滯彼泉傍蘇軾送賈訥倅眉二首

云當年入蜀歎空回未見我眉肯再來童子遙知頌襦
袴使君先已洗樽罍鹿頭北望應逢雁人日東郊尚有
梅我老不堪歌樂職後生試覓子淵才又云老翁山下
玉淵迴手植青松三萬栽父老得書知我在小軒臨水
為君開試看一一龍蛇活更聽蕭蕭風雨哀便與甘棠
同不剪蒼髯白甲待歸來自註先君葬於墓頭山之東
二十餘里地名老翁泉君許為一往感歎之深故及之也
外史玄羽張大齡志云歐陽永叔為明允作志銘云公

葬於彭山之安鎮鄉可龍里在今墓頭山之東地名石
龍柳家溝老翁泉之側或石可二字易誤嘉靖壬子臺
史喻公按眉問老泉墓檄有司求所在而修復之上下
彭眉間數月竟無所得於是從老翁泉之傍設一虛塚
青神余修撰承勛記其事於石又有廣福寺者乃勅賜
門下侍郎蘇轍香火院也宋故事宰相得賜寺院薦福
文定入相時有賜貶官後章呂盡追奪之復官手詔
再賜自為文記之人以為墳必在賜院之近又乃就寺

之後山更作一塚顧頴濱記中云墳之西南十餘步有
泉焉廣深不及尋晝夜瀟湧又曰墳東南四里許有故
伽藍轍以請於朝則前所修泉傍者差是而廣福之墳
非也但廣福傍有古桂樹橫陰一畝大十圍亦非近代
物若明允之族譜亭則在州西南古修文鄉蘇氏祖塋
側今亭廢刻石亦不存矣 碑目云天池院去眉山縣
十里蘇文忠公嘗過之今柱上有手書云自老翁井還
偶憇治平丁未十二月七日子瞻凡十八字 勝覽云

石佛山在眉山之南蘇子瞻寄子由詩石田向何許石
佛山下路下有爾家山千畦種秔稌山泉宅龍蜃平地
流膏乳志云猪龍泉在治南石佛鎮曾有乳猪伏於此
化二鯉盖猪龍也詳見恠異記中志又云孫抃墓在石
佛鎮乾明寺前按乾明寺在魚耶鎮孫學士書樓山學
碑藏寺中即宋賜孫公抃薦福地也 志又云大
旺山在東南五十里自墓頤山南趨或起或伏至此
峰巒屹立迴拱州城盖與三我氣接矣 勝覽云息

臺山在治西四十里東館鎮北太平廣記載眉州有叟
嘗携子入此山遇一道人指其子曰天叟飲道人已長
跪求壽道人取簿檢視曰壽止十八叟與其子懇求不
已乃舉筆改為八十後子壽果如數焉志云大明寺
近東館鎮隋建有九樓十八殿屋厦三千井亦四十八
眼基跡猶存又有燈壁寺在東館鄉宋紹興建有東館
書院紹興初眉州學者甚多州學不能容東館鄉士大
夫呂君玘倣古鄉校初為學廟春秋釋奠以鄉士大夫

居家者主之丹稜令馮時行為之記 志又云連鰲山
在西南九十里山形如鰲傍即栖雲寺東坡少時讀書
寺中嘗於石厓上作連鰲山三字大如屋宇雄勁飛動
其畫專車今存

青神縣

益州記曰青衣神號為雷蜺廟班固以為離蜺也蜀江
至此始有峽之稱華陽國志望帝以熊耳為後戶熊耳
峽即今之縣治矣郡國志云漢武帝使唐蒙破西南夷

路始於此邑也

志云青州城梁置在治南十五里古青

神郡縣皆治此自熊耳山視之今當為百花鎮黃山谷

集云青神尉廳葺城頭舊屋作借景亭下瞰史家園水

竹終日寂然了無人迹又當綠陰之間戲作長句云當

官借景未傷民恰似鑿池取明月蓋尉乃雅安張禮介

卿山谷之中表也志云縣東門外有青羊橋相傳老

子騎青羊過此而入成都又云長泉鎮有麒麟橋王蜀

時麒麟見於此因立麒麟院又云縣西瑞草橋橋崩得

殘碑乃蘇東坡與丈人丈母書也東坡外家在是所謂相望六十里共飲玻璃江矣後洪雅主簿王宣義謝事家居於此東坡贈之詩云歸來瑞草橋邊路獨遊還佩平生壺縣之名勝在乎三巖三巖者上巖中巖下巖也今惟稱中巖焉自縣解維始由芙蓉溪以兩岸多芙蓉也繼由五渡溪以溪水曲折凡五渡也又過慈姥磯有石刻李壁詩云洗盡一春歌酒塵滄江吹破碧粼粼韶華過眼都如夢祇有三峯是故人泊舟直抵下巖

有題名云子瞻子由與侃師至此院僧以路險見止不知僕之所歷有百倍於此者矣丁未正月二十日書沿溪數折有喚魚潭上即慈姥巖也篆刻中巖二大字徑可四尺河南邵博書陸務觀詩云春枕悠然夢何許兩枝筇杖喚魚潭又跋程伯正誼所藏山谷帖云此卷不應携在長安逆旅中亦非貴人席帽金絡馬傳呼入省時所觀程子他日幅巾筇杖渡青衣江相羊喚魚潭清泉翠樾之間與山人掃石置風爐煮蒙頂紫茁然後

出此卷共讀乃稱爾過潭循山三里始至寺為中巖其
傍有羅漢洞即牛頭僧以木鐺叩石笋處此地懸崖峭
壁上刻千佛石覆如屋中有卧仙之迹有玉泉坎黃山
谷銘云玉泉坎坎來自重險發源無所龍口琬琰我來
峽中初酌蛙領靈湫世鮮百泉莫與比甘山僧淳拙煮
餅馨香遠拂淪茗泉味不掩行為白虹止為方鑑口題
此德用勒蒼厓其上巖去中巖一里許唐末有佛刹
號垂拱寺相傳巖下有龍聽僧講經於此由是建寺

有三石筍唐無盡禪師伏虎在石筍下所謂伏虎臺也
范成大詩赤巖倚玲竚翠邏森成削峯蔚嵐氣重稀間
暑光薄聊尋大士處往扣洞門鑰雙撐紫玉闕中矗翠
雲幄應供華藏海歸坐寶樓閣無法可示人但見雨花
落不知龍湫勝何似魚潭樂夜深山四來人靜天一握
驚看杯桂白月影到林壑門前六月江世界塵漠漠寶
甌有甘露一滴洗煩濁捫天援斗杓請為諸君酌 山
谷題名云元豐庚辰歲秋多雨其八月戊午晴遊慈姥

巖禮諾巨那尊者巖下有泉發山足奔突色如乳而味甘取之不竭豈巨那所奉供耶余因竭其舊水涸滌見石少焉復盈坎瀦瀦投澗中喚魚潭投齋餘飯魚出食者數百見人不驚 眉山程逢時跋余玠詩云相公平賊後攜吏上崢嶸裴晉公以後無此奇遇醉翁行樂處草木皆可敬歐陽子而後世無此樂先生晉公德業文忠詞章書史精妙視鍾王有逸氣而於山林悠然心會殆伯仲之間有裴歐也試語山靈自有宇宙便有此山

幾曾有此客耶 邵溥來紹興元年五日旦從其弟博
任也 資中張方自漢川易節益部將母游弟嵩午猶
子觀復二子知復甥何杓侍眉山蘇禮偕來嘉定壬午
二月既望 金華楊緯被命赴闕艤舟巖下敬修尊者
香火而去紹熙壬子孟冬九日弟綜及男師復師晉同
至 河陽郭忠得之行部嘉眉艤舟岩下携子游中巖
瞻拜尊者過憇石笋庵厯覽勝境奇哉政和八年六月
三日 里人任逢被旨赴闕長子商輅侍行親友送別

筭峯者三十有九人嘉定丁丑十月癸酉 邑人楊大
全被旨進朝將家來修淨供宗黨親朋會別於此者五
十五人紹熙三年九月旦 谷居翁大丞相趙公留題
淳祐壬子鄉貢方於此題名巖寺奎書適從天來是秋
楊巽冠外省史夢錫在選中以山英靈發越愈大浚儀
趙公握奎平岡繼偕南宮第一之客明年端午合邑士
楊興仁申錫柄仲夢炎懌森孫侯國史朝瑞彪錫王鉞
文起之巽已程方何明磨崖大書以侈盛舉以開方來

慶元戊午冬高公純遣姪魏了翁赴龍飛策試艤舟
來遊男載夏卿文卿定子姪遊侍行越三年載定子褰褐
行都復侍親過此弟夏卿文卿林卿長弟淞同山下飲
作伴留又二年癸丑秋十月了翁蒙恩召除侍東去舍
于眉信于青衣明日孫真勤飲餞於此兄弟之偕行者
如戊午獨伯仲不與紹定己丑六月丙午郡人蘇薰
侍諸父率四弟以嘉定戊寅上元日游誦坡翁江山風
月本無常主間者便是主人語信然也弟黨書 愁

霖貫序人心久鬱秋季之旦晴景開霽草木悅茂江山
清新太子宮史籍聖源命前王穆伯恭及前進士楊頴
臣廷芳進士程戩景貺羽衣李有慶仲祥出邑東津亭
方舸南下登石徑數里遊中巖僧居清晏薄暮間道而
歸試校書郎領簿馮越石君玉俾識其時乃嘉祐丁酉
之歲也景貺題 辛亥歲予友楚人鍾惺來遊作記云
去青神西南十五里江色盡綠玉中邊皆見隔岸坐立數
山若架閣者中巖也巖下上連延可十數里許迴流峻

壁冥壑複磴竹樹蒙籠大要向背徃復皆與此巖終始
渡江即水月樓樓趾齧江寺冠之由樓視江則已瀕由
寺登樓乃反降階垂窮與樓湊階代樓為梯者強半揣
本齊末度樓之腰猶未能至乎寺趾也降自樓出山門
右行不見江則摩磴如蟻屢折為喚魚潭魚聽掌出石
壁百仞立而微瀕潭漱其脰石無完膚有邵伯溫大書
可模並壁行數武為羅漢洞洞低曲樓而入如行牛角
中隙處稍右則為伏虎巖巖鑿巖為百千萬億佛如恒河

沙數巖之半跨壑為一小石橋銜木其壁為閣若居人
架竹梁上以承燕巢者人屈曲行其下沿緣洞壑俯仰
竹石者數里曰此走井研富順道也巖又半為流杯池
一曰太極池有屋數楹屋後為泉泉流洞中石壁四周
有黃魯直大小三石刻壁間宋元刻頗多每兩石縫接
處往往上下各截其半中嵌俗筆亦有居石隙苟完者
出洞緣磴行輿步數代去所謂羅漢洞伏虎巖者度可
四三里乃復覩前鑿巖佛像須眉厯厯可數才隔一壑

尋橦可度疑前此一段途徑可省矣大抵喚魚潭以往行
皆壑石壁夾之若岸壑若溪藤蘿虧蔽壑中若荇藻老
樹如槎根若石猿鳥往來若游魚特無水耳諸峯映帶
時讓時爭時違時應時拒時迎裒益避就準形匠心橫
豎參錯各有妙理不可思議又行里許蹭蹬拾級乃睹
古中巖題額去三石笋不遠所謂諾詎那尊者引牛頭
僧持鑰扣石笋笋開得低頭佛盜珠是也鍾子曰自中
巖至尊者巖從下視上頂踵腹背其石胍皆當為笋笋

隙且平處則置屋仄則鑿磴斷則為橋處危臨深則設石欄欄則復見江從江中望岩上僧舍佛剎雖一居之內前軒後寢纍纍綴高壁上下疊而不覺其前後通也登岩行屋中皆磴道乃稍得其要領趾後竟即摩前頂石笋中分處如一門尊者像處其中右旋復為佛殿殿傍一笋屹若浮屠與中分者而三實一笋也人直指其巋然三峰者為石笋耳笋上宋元刻亦多俗書災石者亦復倍之萬厯辛亥十月二十一日晚霽與弟恬及父

子登於中岩焉禮諾詎那尊者畢說偈偈曰偶爾喪珠
復返急時扣鑰相求未免勞勞多事世尊不合低頭又
曰未必衣珠真失總緣岩石當開自供羅漢游戲不管
山僧往來說偈訖返 予凡三過中岩皆有詩其一云
中巖如化出秀色類烟含到鳥無歸路游魚或泳潭泉
聲隨地有石笋與天叅若作此山長於心無不堪其二
云再識中岩好彌添乍到情泉流因委曲雨氣益淒清
橋險必當度樓虛何所成惟應石笋上安坐學無生其

三云莫謂客來數耶無塵俗牽岩光浮落日梅意入初
年手搨碑文古身行洞穴連白魚灘最急且宿在灘前
蓋予最後游同青神令康君視搨山谷諸碑刻又自梓
州牛頭洞來故及之

彭山縣

揚雄蜀記秦惠王遣張儀司馬錯伐蜀蜀王開明拒戰
不利退走武陽獲之即此地也郡國志云漢元光四年
益州刺史任安城武陽周圍千三百丈本志云今之舊

土城是有任公橋後漢朱褒獲麟於馬頰嶺因改名為
麒麟橋 漢犍為郡理本志云治西北五里犍為城漢
建元中築碑目云漢犍為太守楊洪碑在彭山縣北小
板橋五十年前餘楊洪碑三字今皆磨滅 華陽國志
云郡去成都百五十里渡大江昔人作大橋曰漢安橋
廣一里半每秋夏水盛斷絕歲歲修理百姓苦之建安
二十一年太守南陽李嚴乃鑿天社山尋江通車道省
橋梁三津吏民悅之嚴因更造起府寺觀壯麗為一州

勝宇其地東接江陽南接朱提北接蜀郡西接廣漢按
晉永和中於此置西江陽郡矣初唐沈宇武陽送別詩
云菊黃蘆白雁初飛羌笛胡琴淚滿衣送君斷腸秋江
水一去東流何日歸 郭璞江賦云流二江於岨崱註岨
山北江所出岨山卽岨山也中江所出皆東注於大江
寰宇記云岨崱山在縣東北十二里導江從山南合流
下有漢張綱墓志云墓在岨崱山東北五十步漢書綱
字文紀犍為武陽人仕廣陵太守平賊黨張嬰有恩卒

之日嬰率其徒五百人送喪還武陽負土成墳而去按
岨峽二山在漢嚴道界其尾入江 雲笈七籤云第五
北平治在眉州彭山縣上有池水縱廣二百步昔越人
王子喬得仙處碑目云此山有大書北平山治之碑餘
不可讀碑陰書大唐上元二年道士施仕衡等字本志
云北四十里北平治應室宿上有天柱峰夜常見五色
燈山下有王喬墓唐杜光庭詩桐栢真人曾此居焚香
厓下誦靈書朝回時宴三山客澗盡閒飛五色魚天柱

一峰凝碧玉神燈千點散紅蕖寶芝常在知誰得好駕
金蟾入太虛 南中八郡志云犍為有魚鳧津數百步
一名彭女津在彭亡山南導江皂江等水會處彭祖塚
及祠在此後漢岑彭為刺客所中而死又名彭亡山亦
名平模山郡國志謂之朝女山云昔有朝祖女於此山
得道今足跡尚存故名志云山距治北十二里曰彭女
彭模平模平無皆一山 神異記云犍為有一白虎出
則衆黑虎隨之不傷人物漢王褒招碧雞神詞黃龍見

兮白虎仁蓋指此也寰宇記引秦昭王射白虎事非

李膺益州記云周德既衰九鼎淪散一沒於此或見其
鼻故名鼎鼻山一名打鼻山上有城亦名鼎鼻打鼻音
近也大江過於山下有灘宋將朱齡石伐蜀立寨於此
括地志云鼎鼻山北有龍洲東接導江水按已上即常
璩所稱王喬升其北山彭祖家其彭蒙白虎仁於廣德
寶鼎見於江漑也漢書綏和五年犍為人上寶磬十
六此地因謂之寶磬洲益部耆舊傳朱導武陽人仕

為功曹率兵拒公孫述絆馬死贈復漢將軍有祠後
漢建安二十四年黃龍見武陽赤水九日劉氏以為瑞
應因立廟在長江村導江東岝碑目云漢刻黃龍甘露
之碑在彭山黃龍鎮今移於繫龍橋周地圖記云彭山
縣北四里有潭水後漢漢安元年仙人瞿君武入峨眉
山得道每年繫龍於灘龐籍詩巢鳳閣邊勞遠夢繫龍
灘下認前題按已上即常璩所稱犍為上寶磬十六劉
向以為美化所降後漢朱遵拒公孫述光武以為士大

大郡建安末年黃龍見武陽赤水蜀人以為劉氏之瑞
應也 寰宇記云金華山在彭山縣東五里有丈六佛
像夜多神燈 紀勝云彭山東北六里盤石山普照寺
藏有宋太宗真宗仁宗御書崖之半有石室范鎮詩云
窮幽訪盤石細徑入荒涼踏葉履屨濕觸花衣袂香

方輿云平蓋山在彭山縣北二十四化之一也七籤云
山下有玉人長一丈三尺昔吳郡崔孝通於此學道得
飛仙本志云平蓋治上應婁宿治前洗墨池唐隱士羅

公遠題詠之處有清暉滌覽二亭提刑張方記以為在
鼎鼻山椒而勾氏之逍遙軒恰與之相對也杜光庭詩
云勢壓長江空八陣吳都仙客此修真寒江向晚波濤
急深洞無風草木春江上玉人應可見洞中仙鹿已來
馴龍車鳳輦非難遇只要塵心早出塵亡名氏詩云平
蓋山高古木疎昔人曾此築仙居井通八角寒泉湧觀
燬三清劫火餘洗墨池邊丹竈冷繫龍岩畔石潭虛吟
成獨坐荒苔上間看蝸牛學篆書 七籤云本竹觀在

彭山治北相傳以為竹林黃帝所手植者杜光庭詩云
樓閣層層觀此山雕軒朱檻一躋攀碑刊古篆龍蛇動
洞接諸天日月閒帝子影堂香漠漠真人丹澗水潺潺
掃空雙竹今何在只恐投波去不還 楊祐甫彭山十
事記一曰象耳山二曰彭祖宅三曰大悲道場四曰寶
現磨鍼二溪五曰太白書臺有石刻太白留題云夜來
月下卧醒花影零亂滿人襟袖疑如濯魄於冰壺也杜
光庭詩山中猶有讀書臺風掃晴嵐畫障開花月冰壺

依舊在青蓮居士幾時來六曰師悟志棲二大士會昌
寺七曰薛范二詩八曰龍池蠓泉九曰千歲松栢十曰
石恪畫護法神 志云縣東北二十五里有磨鍼溪在
象耳山下相傳李白讀書山中學未成棄去適過是溪
逢老媪方磨鍼杵問何為曰欲作鍼耳白感其言遂還
卒業媪自言武姓傍有武氏崖薛能過象耳山詩一色
青松幾萬栽異香熏路帶花開山門欲別心潛願更到
蜀中還到來又到處逢山更欲登自疑身作往來僧徒

行至此三千里不是有緣應不能文同題象耳山寺詩
轉谷縈岩路始窮隔林遙望一門通溪山俱在見聞外
臺殿盡藏懷抱中像閣杳冥明海日經幢瓔珞撼天風
勞生又逐輕舸去珍重高僧解苦空碑目云縣北四
十里有古塔刻云唐中和三年浴佛日知玄禪師自成
都遊峨眉還至此山愛其幽僻遂立庵於上名曰知玄
庵按已上即酈道元所稱武陽龍尾仙者羽化之所
神棲白雲屬想芳流藉念泉鄉遺詠在茲也寰宇記

云馮翊王廟在縣五里古老相傳有漢馮翊王郭子明墓按漢書功臣非賜姓者不得封王恐此非實又漢武帝遣拔胡將軍郭昌再度入蜀討南夷昌字子明漢紀云武帝元封六年益州昆明反使將軍郭昌擊之或即是此人 碑目云彭山縣東三十里有宋師中碑云梁武陵王蕭紀寓此練兵欲東下故後人為立武陵寺方輿記云縣界有樂黎城唐開元十道要略云漢何斌為蜀郡太守理於此時郡邑凋殘人物窮困乃以己祿

米施惠百姓此數城之民由是獲存臨別百姓以白米
倍填曰荷君父之恩無以報後之州郡有職田始於此
矣

丹稜縣

志云赤崖山在治北二十里高聳赤色如鳥旂之狀拱
翼縣治雖林木叢茂不能蔽之縣以此得名也其下即
多稜川矣 漁隱叢話云花卿冢在丹稜之東館鎮至
今猶顯英氣血食其鄉按花欽字敬定本關中人唐

至德間從崔光遠入蜀討段子璋有功後平寇亂單騎
鏖戰喪其元猶操戈至東館鎮下馬沃盥適遇浣紗女
謂曰無頭何以盥為遂自僵仆居民葬之溪上廟祀不
絕宋封為忠應公邵博云州西有花將軍廟廟史以匣
藏唐至德元年十月鄭丞相誥云花敬定將軍也謝舉
羽花卿冢行云濕雲糝糊埋秋空雨青沙白丹稜東莓
苔陰陰草茸茸云是花卿古來冢花卿舊事人所知花
卿古冢知者誰精靈未歸白日西廟鴉啄肉枝上啼縣

州拓黃龜正飛 本志云縣北十五里龍鵠山三大字

宋孝宗書也有松柏山碑記云山有三宮九觀乃成無
為楊正見李鍊師成道處唐天寶年建杜光庭題龍鵠山
詩抽得閒身伴瘦筇亂敲青碧喚蛟龍道人掃徑收松
子缺月初懸天柱峯李燾詩曰已作清時鳥倦飛杜鵑
何事更催歸似嫌住處猶城郭不解携家隱翠微其子
壁詩云蕭條白日閑岩扃留作遊人萬古情猶有山中
舊時鹿舉頭如聽讀書聲 此縣有楊素翁者奇士從

黃魯直遊盡刻杜子美兩川詩於眉山所謂大雅堂也
魯直記曰余謫居黔州盡書子美夔峽兩川諸詩以遺
丹稜素翁俾刻諸石使大雅遺音久湮沒而復盈三巴
之耳素翁乃作高屋廣楹以庇此石因請名焉余名之
曰大雅堂仍為作記其畧云由子美來四百餘年斯文
委地文章之士隨世所能傑出時輩未有升子美之堂
者况家室之好耶余嘗欲忻然會意箋以數語終以汨
沒世俗初不暇給雖然子美詩妙在無意於文而意已

至非廣之以國風雅頌深之以離騷九歌安能咀嚼其
意味闢然而入其門耶故使後輩自求之則得之深矣
使後之登大雅堂者能以余說而求之恩過半矣彼喜
穿鑿者棄其大指取其發興於所遇林泉人物草木魚
虫以為物物皆有所託如世間商度隱語者則子美之
詩委地矣

蜀中廣記卷十二